



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL  
PANELI ZGJEDHOR PËR ANKESA DHE PARASHTRESA  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.243/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Arsim Hamzaj kryesues, Kymete Kicaj dhe Skender Çoçaj - anëtarë, duke vendosur përkitazi me ankesën e subjektit politik Partia Demokratike e Kosovës (PDK), me seli në Prishtinë, paraqitur kundër subjektit politik Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 01.02.2025, merr këtë:

#### VE N D I M

- I. PRANOHET e bazuar ankesa e subjektit politik Partia Demokratike e Kosovës (PDK), me seli në Prishtinë, Anr.243/2025 e datës 29.01.2025
- II. Lëvizja Vetëvendosje (LVV), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, i shqiptohet dënimi më gjobë në lartësi prej 4,000.00 (katërmijë) euro.
- III. Detyrohet Lëvizja Vetëvendosje (LVV), që gjobën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

#### A r s y e t i m

Me datën 29.01.2025 PZAP-i, ka pranuar një ankesë nga subjekti politik Partia Demokratike e Kosovës (PDK) me seli në Prishtinë, në të cilën pretendohet se kandidatja për deputete nga radhët e subjektit politik Lëvizja Vetëvendosje (LVV), znj.Fatmire Kollçaku, ka publikuar një video në rrjetin social facebook me tekst shoqërues në ambientet e Kuvendit të Republikës së Kosovës, me qëllim të përfitimit të votave. Tutje në ankesë është theksuar se, konkretisht e njëjta video e cila është realizuar në sallën e Kuvendit të Republikës së Kosovës, përgjatë fjalimit të mbajtur në një nga seancat plenare të Kuvendit të Kosovës, e ka publikuar me tekst përshkrues "118. 18. #cepmecep" dhe

kandidatja në fjalë, këtë video e ka publikuar me qëllim të promovimit të numrit në listën me të cilën kandidon për deputete dhe se kjo video është regjistruar në ambientet e Kuvendit të Republikës së Kosovës dhe kjo video vazhdon të jetë aktive edhe më tutje.

Më tutje parashtruesi i ankesës thekson se me këtë veprim, janë shkelur dispozitat ligjore të nenit 36, paragrafi 1 i Ligjit Nr.08/ L-228 për Zgjedhjet e Përgjithshme në Republikën e Kosovës. Parashtruesi i ankesës ka kërkuar nga PZAP që të nxjerrë vendim me të cilin do të aprovojë si të bazuar ankesën e PDK-së dhe ndaj subjektit politik LVV, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, t'i shqiptojë dënim me gjobë.

Si provë parashtruesi i ankesës ka bashkangjitur postimin në facebook me fotografi dhe video.

Më datë 29.01.2025, PZAP-i, e njoftoi subjektin politik Lëvizja Vetëvendosje (LVV), me seli në Prishtinë, për ankesën e paraqitur kundër tyre, duke i dërguar kërkesë për përgjigje deri me datë 30.01.2025 në ora 13:00.

Në përgjigjen në ankesë të datës 30.01.2025, të subjektit politik Lëvizja Vetëvendosje (LVV), ka theksuar se ankesa është e pabazuar, për arsye se Fatmire Kollçaku është deputete e kësaj legjislature në Kuvendin e Kosovës, ankuesi ka paraqitur fakte të rreme në këtë ankesë, pasi që video lëre që më nuk ka kurrfarë përmbajtje të promovimit të fushatës siç pretendohet në numrin 5 të ankesës, mirëpo e njëjta video është realizuar për qëllim të promovimit të luftës kundër dhunës në kuadër të veprimitarisë së deputetëve dhe se deputetja në fjalë në asnjë moment në kuadër të videos nuk përmend fushatën as numrin e saj në listë, por bën thirrje kundër dhunës, projekt ky i financuar nga Kombet e Bashkuara me emërtimin "bodyright". Më tutje përmes përgjigjes në ankesë ka kërkuar nga PZAP që ta refuzojë si të pabazuar ankesën A.nr.243/2025 dhe të shqyrtohet mundësia ligjore që këtë ankesë ta trajtojë si shkelje nga subjekti politik PDK në bazë të nenit 34 paragrafi 1 nën paragrafi 1.10.

PZAP-i, pasi që shqyrtoj dhe vlerësoi ankesën gjeti se:

#### **Ankesa është e bazuar**

Paneli pasi që shqyrtoi pretendimet ankimore dhe përgjigjen në ankesë, ka gjetur se postimi i videos është ende aktiv në llogarinë e facebook-ut të kandidates për deputete nga radhët e Lëvizjes Vetëvendosje (LVV), Fatmire Kollçaku. Nga provat materiale e bashkangjitur ankesës, të Subjektit Politik PDK dhe shkresave tjera të lëndës, paneli ka vlerësuar se nga ana e kandidates për deputete nga radhët e subjektit politik, Lëvizja Vetëvendosje është shkelur Rregulla Zgjedhore Nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, pasi që kandidatja në fjalë, me qëllim të promovimit të numrit në listën me të cilën ajo kandidon për deputete, është regjistruar në ambientet-hapësirën e Kuvendit të Kosovës, dhe kjo video është ende aktive edhe gjatë fushatës zgjedhore, veprim ky i cili bie në kundërshtim me dispozitën e nenit 36 par.1, Ligji Nr.08/L-228 për Zgjedhjet e Përgjithshme në Republikën e Kosovës parashihet se: "*Personi që mban pozitë publike, i zgjedhur apo i caktuar, nuk mund të përdorë atë zyrë ose ndonjë nga pasuritë e saj me qëllim të përfitimit të votave*".

Edhe pse sipas përgjigjes së dhënë në ankesë pretendohet se kandidatja për deputete nga radhët e subjektit politik LVV, ka shfrytëzuar hapësirën e Kuvendit të Republikës së Kosovës për të bërë thirrje kundër dhunës, projekt ky i financuar nga Kombet e Bashkuara dhe se kjo

video nuk ka kurrfarë përmbajtje të promovimit të fushatës, mirëpo sipas vlerësimit të panelit në video vërehet mbishkrimi me numrin e Subjektit Politik LVV dhe numrin e kandidatës për deputete, përkatësisht “118 dhe 18 #cepmecep”, me të cilët numra dhe slogon subjekti dhe kandidatja në fjalë garojnë në zgjedhje, me qenë se kjo video vazhdon të jetë aktive në facebook, në llogarinë e kandidatës për deputete Fatmire Kollçaku, andaj konkludohet se është duke u përdorur gjatë fushatës zgjedhore me qëllim të përfitimit të votave, e që sipas vlerësimit të panelit ky veprim është në kundërshtim me dispozitat ligjore.

Rrjedhimisht sipas vlerësimit të panelit veprimet e kandidatës për deputete Fatmire Kollçaku, bie ndesh me dispozitën e nenit 36 paragrafi 1 të LZP-së dhe rregullës zgjedhore 07/2024.

Kështu që paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se ky veprim i tyre përben shkelje të legjislacionit zgjedhor. Kjo konsiston se subjekti politik LVV, ka qenë i njoftuar me obligimet dhe përgjegjësit gjatë procesit të fushatës zgjedhore. Andaj përfshirja e videos për fushatë zgjedhore në ambiente të institucionit, në këtë rast të Kuvendit të Republikës së Kosovës, e që përben shkelje të legjislacionit zgjedhor, saktësisht e sanksionuar me dispozitën e lartcekur të rregullës zgjedhore.

Paneli me rastin e shqiptimit të gjobës ka pasur parasysh edhe praktikën e mëhershme për rastet të ngjashme.

Nga arsyet e theksuara me lart, e në kuptim të nenit 36 paragrafi 1, neni 118 paragrafi 1, neni 120 paragraf 1 nën paragrafi 1.3, të LZP-së, vendosi si në dispozitiv të këtij vendimi.

**Paneli Zgjedhor për Ankesa dhe Parashtresa**  
Anr.243/2025 më datën 01.02.2025

**Kryesues i Panelit**  
Arsim Hamzaj



***Këshilla Juridike:*** Kundër këtij vendimi nuk lejohet ankesa konform nenit 118 par. 4 të LZP-së.